

**NAMIBIA SENIOR SECONDARY CERTIFICATE**

**FIRST LANGUAGE OSHIKWANYAMA HIGHER LEVEL 8304/1**

PAPER 1 Reading and Directed Writing

2 hours 30 minutes

Marks 60

**2020**

Additional Materials: Answer Book

**INSTRUCTIONS AND INFORMATION TO CANDIDATES**

- Write your answers in the Answer Book provided.
- Write your Centre Number, Candidate Number and Name in the spaces on the Answer Book.
- Write in dark blue or black pen.
- Do not use correction fluid.
- Answer **all** questions.
- Pay attention to spelling, punctuation and sentence structure.
- The number of marks is given in brackets [ ] at the end of each question or part question.

**OMALOMBWELO NOMAUYELELE KOVAHONGWA**

- Nyola omanyamukulo oye mEmbo lOmanyamukulo olo wa pewa.
- Nyola onomola yOsenda, Onomola yEkonakono nEdina loye kEmbo loye lOmanyamukulo.
- Nyola nopena imbulau ile ilaula.
- Ino longifa okadimifo komeva.
- Nyamukula omapulo **aeshe**.
- Kotokela esipelo loitya, elongifonawa loileshifo netungo lomatumbulo.
- Omwaalu waitwa owa yandjwa moikondekifombine [ ] konima yepulo keshe ile yoshitukulwa shepulo.

This document consists of **6** printed pages and **2** blank pages.



**Republic of Namibia**

**MINISTRY OF EDUCATION, ARTS AND CULTURE**

## OSHITUKULWA SHA-A

Lesha nawa ouleshwa ava tava shikula ndele to nyamukula omapulo taa ka pulwa.

### Okaleshwa 1

#### Outeku wanakanena

Omunanguwo womido dopokati wedina Ndesihanga yaHaidula, okwa yambukile moshitukulwa shaWambo moNamibia, ashike okwa putukila mOushimba mOvenduka. Okwa kala ha di komaumbo omodoolopa, ha longele ehanganano hali landifa oitungifo, ngaashi eedalute, eedopi, eepala nosho tuu. Ye mwene okwa kala e na eumbo lopamufika wopombada, longushu yoimaliwa yamadu.

Ndesihanga okwa kala e na ovana vavali novatekulu vavali meumbo laye, ovo ha file oshisho. Eshi ounona va wanifa omido dokuhovela enongelo, okwe va tamekifa diva, shaashi okwa mona lela kutya mounyuni wopaife omunhu oku na okukala a mona ehongo, opo aishe i ke mu endeke nawa monghalamwenyo yaye. Ndesihanga naye mwene peendada oku shii po lela nokwe lihonga koiputudilo yopombada, meni nopondje yoshilongo.

Oilonga yaye oya li popepi neumbo laye, onghee iha kala ko unene navali mbela iha tanguninwa kovakulunhu voilonga, eshi iha ningi ko nomunute. Okwa kala ha telekele ounona omafimbo amwe, ye omafimbo mahapu te ke va landela oikulya, oyo hai hangwa ya longekidwa nale okudja mofitola, ngaashi ochevisa yomakoko, omihaka nosho tuu, omanga ovanhu inava ka endeka ouluvi. Peemhito dimwe, ounona ohava ka wa onhundulu, unene tuu ngeenge va li tava tale o-TV fiyo omeenhundumene, nohashi ke va ningila shidjuu kenongelo, shaashi ohava monika va loloka vo otava kofa meetundi, nomandjadja avo ohaa kala taa kwena kondjala.

Keshe fiku ongula Ndesihanga oha kwata oxuxwa komulungu a ndjeneke omeva kefiya lokolusheno, opo ounona va ye ve likosha kenongelo nomeva mapyu, shaashi ohaku kala kwa talala neenghono. Okwa kala he va pe, keshe umwe eedola efele mefiku, opo ve ke lilandele oikulya neenamunate kokafitola koushikepengeyo penongelo ile peefitola odo di li popepi nofikola. Ounona ava ova li hava lande oikulya yondilo, vo tava leve vakwao.

Oilonga yaye oya kala hai futu nawa nokwa kala ha file ounona vaye oshisho, unene tuu ngeenge tashi ya pomudjalo wenongelo. Okwa kala ha landele ounona vaye omudjalo wofikola keshe koshikako. Omudjalo wofikola ngeenge owa pomboka ile wa tauka kanini, ohe u nyikifa omutemo inapa kalwa, vati ounona itava i nomudjalo wa kulupa va fa vehe na ina ile inakulu. Eshi oshe ke mu pula oimaliwa ihapu, shaashi ounona ova kala hava pombolele omidjalo davo dofikola owina, ve wete kutya apa ha kufa ihapa pu.

Ndesihanga ponhele yokukunghilila ounona ve ke lihonge nokumana oifiilwalonga yavo, okwe va longa va kale hava tale o-TV keshe efimbo eli va hala, shaashi otai va hongo eenghedi dopashinanena. Ovo vene ve na okuhoolola eshi va hala okutala noinima ei inava pumbwa okutala ohave i tale pehe na oudjuu washa. Ounona ava ove lihonga mo shihapu shi dule osho sha pumbwa okushiivika kounona vepupi lavo.

Meme Ndesihanga okwa kala ha lande oikulya noipumbiwa aishe yomeumbo ngeenge eshamane le lidenga po, nounona ova pewa epitikilo opo va lye keshe eshi va hala nefimbo lavo. Oimaliwa yaye yokomwedi okwa kala ashike he i mane po, ndele iha kufa po nande oimwe a ka pungule.

Ofikola younona nande ya li oshinano shixupi okwe va kongela oshiendifo shoku va twala noku va alula kenongelo efiku keshe. Efiku olo ngeenge oshiendifo osha teka, nena oha ti nava faule. Oshinima yo shimwe sha li hashi ningwa kuNdeshihanga, okwa li ha dengele ongodi kenongelo, a pule ovahongifikola kutya omolwashike ounona vaye hava dopifwa. Omafimbo amwe oha i ko, a ka homone ovahongi moipambe yeeveta dehongo. Unene oha kala omhinge noveta oyo tai kelele ovahongwa vaha ye neengodi kofikola, unene tuu ngeenge ounona ova velwa ombedi shaashi va kaula onyanga. Ke hole nande ounona vaye tava kumwa ile va popiwe, shaashi vati naye mwene ihe va popi. Eshi osha eta opo ounona ava va kale have lihumbatele nai ovahongi, shaashi ova mona kutya ina ohe va tula kombuda. Oshinima eshi osha kufa eemwenyo dovahongi vamwe peenhele, shaashi kape na vali elongelokumwe pokati kaye navo.

Oohandimwe ashike va kala ve hole oukwatya waye, ashike vahapu ova li ve mu pa ekombo, unene tuu ngeenge tashi ya pokutekula oheembudangele veumbo laye, shaashi okwe va tekula ondebula, nonande ye kwa li e wete ta ningi oshinima sha yuka.

Ounona ava ngeenge va fiki meumbo, ava voukadona ohava tula ashike eendjato davo meenduda, ndele tava i va ka danauke neengodi davo dopomake ile poukompiuta vavo ovo va landelwa. Ava voumati, oto hange va fikama momapandavanda tava shili omakaya nokunwa oingangamifi, shaashi oimaliwa oyo hava pewa keshe efiku ihave i longifa po aishe okulanda oikulya kenongelo ngaashi sha li sha teelwa.

Konima yomido donhumba, ounona novatekulwa osho va mane omanongelo avo, ndele inava eta nande oidjemo tai hokwifa. Meme Ndeshihanga nokoilonga okwa tuwa ko naye oilyavala, etemo la wa momupini, shaashi iha holoka koilonga ye ohe ya alushe a tokelwa. Ovatekulu vaye eshi va mona kutya peumbo itashi pi nameva, ova tokola okulikufila vo vene, osho sha eta va kale keshe efimbo va landulwa keemwiya daShinana. Eshi ve shi mona, ova ya oungangala koshishiindalongo Angola, fiyo okeluwa eli, ihava dumwa. Ovana vaye voukadona ove mu kalela, va dala nokomushila, vati inga va lya edu! Omo ngaho nee to va hange meumbo omo ve litala ashike omesho noihava dulu okulonga sha, shaashi oilonga inave i ikilila.

Keumbo lokodoolopa oku va li, ova tembuka ko, ndele tava lande eumbo kolukanda laHavana. Omafimbo amwe ohava longifa omalexita, shaashi kape na oshimaliwa shokulanda olusheno. Nakaidi shaashi oya li tai xweenene, oha ka landa otombo a lunge onhakwi, a makele noludalo laye, shaashi wonale okwa tile, "onghoshi ya fya ondjala; ohai li nomafuma".

*(Ka shangwa ku E. Shikesho)*

## Okaleshwa 2

### Efimano leenghulunghedi

Onda kufile omhito ndi ka talele po komukunda wonhumba moshilongo. Eshi nda mona kwinya itandi ke shi dimbwa nande monghalamwenyo yange. Oshinima shotete nda didilika komukunda kwinya osho ekwatafano liwa pokati komunhu nomunhu. Ovanhu ove na elongelokumwe. Ngeenge nande ove na okakulya ile okakunwa, nena keshe umwe oku na oku ka nwa ile oku ka lya, tava ningi mushiinda ekipa lofingo. Momukunda ngeenge omu na oshiifanene shonhumba, nena ove na okuongala pamwe opo ve lindungike, vo va potokonone omikundu odo da kundukida eenghalamwenyo davo defiku nefiku. Eshi shiwa, osheshi kutya outeku womomukunda ou ohau ningwa pamuhanga, sha hala kutya keshe omukulunhu oku na oufemba wokuvela okaana ombedi ngeenge oke lihumbata nai komesho yaye, kutya nee ohaka di meumbo laye ile okopoushiinda, shaashi vati, omunwe umwe ihau litoola ona.

Ovanamukunda ohave liifana pehe na oudjuu washa, nove na okuninga okakungungu oko ke kwetelwe komesho komakanda omomukunda, noilonga aische ohai i komesho nawa pehe na nande oumwe ta undulile mukwao kwinya ile te mu shilile oku. Poilonga opo keshe umwe oha kala e na ehafo, li dule nokuli nolambishi meumbo mwa tomwa.

Wonale okwa tile nokuli: “Pohaulwoye oponguwo, ngeenge opa pomboka, oove mwene to hondjo po”, ngeenge tashi ya penongelo, oohembudangele osho yo ovanyasha ohave lipitula nokulongifa oikwanambwiyu yavo mokuya kofikola i li omukakena womanha omunhu a kasha, e fike pomayovi ahamano. Eshi ohave shi ningi, opo ve lihonge nouidiinini mokudiladila eshi tava mono oixuna yokuenda keemhadi oshinano shile. Ounona ngeenge tava i keetundi, ohava i ko neembaio diyadi ndo oshikundu. Oshikundu oshikunwa sha fimana neenghono komunhu, shaashi ohashi denge po ondjala nenota. Eshi ohashi eta ve litule mo meetundi, shaashi pomadimo ohapa kala pa pama lela.

Ounona ohave liile mo vo vene moilonga. Eshi osha hala okutya, ihava teeleele va dimbulukifwe oilonga, ndele ovo vene hava kala ve i kwetele komesho. Ovakulunhu ohave ya ashike okutala ngee oshilonga sha longwa tuu nawa ile ve va wedele po ngee pamwe opa pumbwa eendekululo.

Ovapati ngee va dimbuka kofikola ove na oshinakuwanifwa va pitife oimuna, va ka life noku i twala ketambi nokutala ongubu ngeenge i na apa ya panuka. Etango shimha la ka pa ovana, ohava kala omutumba polupale va teeleele va ifanwe kepata, va ka tale ouvalelo wavo. Tashi ti keshe efimbo ove li ashike kolupale, vo tava fi oindjola nge tava popi oinima yavo yoshimati naayo va umba eisho koufita nokoukongo ile ngaho eshi va kundana kofikola. Ngeenge tashi ya koilonga hai longwa kovananguwo, oto hafe. Kepata ohaku kala ashike eendona tadi shi takula nawa, do tadi yakula mo ooina. Ohava ka tyava komuhenye efimbo lomutenya, onghee kape na efiku omunhu a ude taku ti, ovanhu meumbo onghudi ye va twa omupuma ile va lele inava tauluka oshedi.

Ovakulunhu omafimbo amwe ohava kufa omhito yokuxungila nounona vavo, opo ve va honge okukala ovalineekelwa, vo va kale yo ovapukululi vavakwao mefimbo lopaife nomonakwiiwa. Elalakano lokuxungila novana, oku va hongwa owii wokuya momilele manga inava ya mohombo, osheshi otava dulu ve ke lihange ve na onunona vahapu, ovo itava ka dula oku ke va fila oshisho ovo aveke pehe na ovadali aveshe. Ounona ohava kunghililwa yo, opo vehe lihonge ombudi nokunwa oikolwifa noingangamifi, shaashi oinima oyo otai dulu oku va twalifa momake opolifi, ndele tava i modolongo, vo va ka ulwe oitiwa-walye. Ohava kunghililwa yo vaha kale neengodi dopeke, ndele ve di hange ngeenge ofikola ya dimbuka, ashike otave di longifa ngee va mane oilonga yavo yofikola nosho yo yomeumbo, shaashi ongodi yopeke otai dulu okudopifa omuhongwa.

Ovadali vahapu komukunda ou inava kongholwa momutwe, onghee ohashi va pe oudjuu wokupukulula ounona vavo. Ashike nande ongaho, ounona ohava pewa efimbo la wana opo va longe oipewalonga yavo nokulihonga, opo va dule ve ke shi endife nawa meenghalamwenyo davo. Ovadali ava ova kala yo nokuya keefikola dounona vavo, opo ngaho ve ke likwashilipaleke tuu ngeenge ounona vavo otave shi endifa tuu moilonga yavo yofikola ile pamwe ova pumbwa ekwafo lonhumba la wedwa po.

Pokumanga Omunghumbi, ovanhu momaumbo ohava li poshimbale shimwe neenyala, she likwatelela komapupi avo. Oupaka ove li ngaho pelilo lavo, omakanda oku li kolupale noshindjaya, omanga oopembamukweni va dingonoka elilo lavo pepata. Ohapa kala omukulunhu oo e na oku va tukulila ombelela konima ngeenge va mane okulya oifima. Ombelela ohai liwa ashike omalufe, unene ngeenge kwa tomwa. Ohai kwatwa nawa, ndele tai dingulwa nokutuvikilwa i liwe ashike fiku pe ya omweenda, ndele ihai liwa po nande onghwanghala. Momaumbo omu, oto hange unene ovanhu tava velele omashini, omavanda, okayongoti, oingali nosho tuu ile va lye omusha womakunde nomahola.

Mwene womukunda oha ongaleke ovanamukunda vaye momuti woyoongalele, opo e va lombwele elandulafano lomukunda waye. Ohe va kumaida ve lihumbate nawa vaha shindafane, va file oimuna noushitwe oshisho, okukongelela nokuidilila nokudiinina oilonga yomomapyia. Ohava kunghililwa vaha yashe oudilona, vaha ke po omiti epwanga nokundalapatela omeva.

Oshinima shimwe yo nda mona momukunda omu, onghalo yokulihakula mwene. Momukunda omu ovakulunhu vahapu nge va hangwa komaudu anafangwa, ihava tondokele koihakulilo, ashike ohava longifa oihemba yavo yopamufyuululwakalo wOshiwambo, ngaashi omidi domionde, omapumba oowamululu, nosho tuu, nokudja opo eshikisha ile omukolo ohau ti “nda ya”.

*(Ka shangwa ku E. Shikesho)*

- 1 Owa dja nokulesha ouhokololo vavali tava popi kombinga youteku wanakanena nefimano leenghulunghedi komikunda. Yandja omayooloko kombinga youteku wounona taa hangwa mouleshwa ava.

Shi ninga noitya **250 – 300**.

**[20]**

- 2 Ove ou li omukulunhufikola muimwe yomeefikola domoshitukulwahongo sheni. Owa koneka nghee ovadali novatekuli vounona ava hava fikola penongelo leni have va tekula.

Nyolela ovadali novatekuli vounona vopofikola yoye ombilive, u va kunghilile ove u va pe omayele mawa nghee ve na okutekula ounona vavo.

Ombilive yoye nai kale pokati koitya **250 – 300**.

**[20]**

**OSHITUKULWA SHA-B**

- 3** Keshe apa to ende moNamibia, ito kala ino uda ovanhu tava popi edengelo lodi peisho. Eshi ohashi lopotwa unene moifokundaneki, mee-TV nomeeradio. Onghalo yalunga litapula oya eta, oshilongo shi shune pedu paliko, osho sha eta, opo ovanailonga vahapu etemo liwe momupini. Ovanailonga vamwe vepangelo ile vomomahangano opaumwene ohava longifa omaliko ovayandji voilonga vavo pamikalo inadi ufwu. Ovakulunhu vomahangano amwe ile meembelewa dopapangelo oto hange tava lile owishi kelambo, yo oilonga otai yandjelwa keembuda; tai pewa naava vehe na ouhongelwe womufika wondodo opo va tulwa. Edengelo lodi peisho ola pumbwa okuxulifwa po diva, manga oshilongo inashi ya ombwa yaNelenge.

Ove ou li omulihongi kOshiputudilohongo shimwe shomoshilongo. Nyolela nee o-artikela yoye kushimwe shomoifokundaneki moshilongo, u holole eudonai loye. Holola yo eenghendabala da ningilwe, ove u yandje omafaneko kwaasho wa diladila shi ningwe, opo okulunga nokulitapula ku pewe ombuda.

O-artikela yoye nai kale pokati koitya **250 – 300**.

**[20]**

**BLANK PAGE**

**BLANK PAGE**

